

01.07.2010 – Ried vum Jean Huss iwwert professionell Qualifikatioune vu verschiddene Gesondheitsberuffer.

(Séance publique 39, Compte rendu 15, Page 551)

6062 – Projet de loi relatif aux qualifications professionnelles des professions de médecin, de médecin-dentiste, de médecin-vétérinaire, de pharmacien et de certaines autres professions de santé...

M. Jean Huss (*déi gréng*).- Merci, Madame Presidentin. Nodeem hei d'Madame Dall'Agnol op eng absolut sachlech an ausféierlech Aart a Weis déi verschidde Facettë vun dësem Projet de loi duergestallt huet, souwuel dat, wat an deenen europäeschen Direktiven drasteet, wéi och dat, wat elo u punktuellen Adaptatiounen un eiser Gesetzgebung par rapport zu deene verschiddene Beruffer vun Dokter, Zännokter, Veterinärdokter, Apdikter an esou virun, gemaach ginn ass.

An nodeem och déi zweet Rapportrice, d'Madame Stein, vun dësem Projet dat nach eng Kéier widderholl huet a souguer méi ausféierlech an d'Detailer gaangen ass. An nodeem och de Carlo Wagner, mäi Kollege Carlo Wagner, fréiere Gesondheitsminister, nach eng Kéier méi spezifesch op e puer Aspekter dovunner agaangen ass, notamment nach de Sproochenaspekt, virun allem deen, deen - mengen ech - eng interessant Dimensioun huet, wéilt ech hei mech nëmme kuerz dozou äusseren.

Fir d'Éischt, well ech am Prinzip keng gréisser Dissensiounen hu mat deem, wat am Projet de loi drasteet, a mat deem, wat och hei vu menge Virriedner gesot ginn ass. A well ech och keng Loscht hunn, alles dat ze widderhuelen, wat hei scho gesot ginn ass, a well ech souwisou och nach hannenno muss op en aneren Aspekt vun eiser Gesondheitspolitik méi an den Detail agoen. Ech wéilt vläicht just e puer punktuell Bemierkunge maachen, déi mer wichteg erschéngen.

Zum engen zum Sproochenaspekt, wou den Här Wagner scho gesot huet, wou mer eis an der Kommissioun no engem längeren Hin an Hier awer op eng Aart Kompromissformel gëeenegt hunn, déi och fir eis absolut akzeptabel ass, well et effektiv du pour et du contre gëtt. Den Här Wagner huet virun allem geschwat vun de Verständnisschwieregkeeten, déi kéinten optrieden tëschent de Patienten an dem Dokter, wann deen net iwwert déi néideg Sproochkenntnisser géif verfügen.

Ech géif an deem Sënn souguer nach eppes anescht derbäifügen. Et gëtt Etüden, déi noweisen, datt e gutt Verhältnis vum Patient zu sengem Dokter oder vum Dokter zu sengem Patient, well dat baséiert jo och op relativ gudden Sproochkenntnisser - et ass jo emol eng Viraussetzung dovun -, datt, wann esou e gutt Verhältnis besteet tëschent Dokter a Patient, am Fong den Dokter selwer nëmme duerch dee Kontakt mam Patient dee beschte Placebo ka si fir d'Heelungschancë vun deem Patient, mat deem en ëmgeet. Dofir spillt natierlech d'Sproochkenntnis schonn eng gewësse Roll.

Op där anerer Säit hu mer natierlech awer och dee Fait, deen hei och vum Här Wagner richtegerweis ervirgehewe ginn ass, datt déi Sproochkenntnisser awer keng absolut Barrière d'äerfe si par rapport zum Zougank op eise Marché vun den Dokteren, déi aus dem Ausland heihinnerkommen an déi eventuell net direkt, mindestens an enger éischer Phas net direkt, iwwert déi néideg Sproochkenntnisser verfügen. Si solle wierklech awer dann d'Chance kréien, sech lues a lues esou Sproochkenntnisser unzëeegenen.

Da wëll ech just nach agoen op een Aspekt, dee mir uewe läit an dësem Gesetz, dat ass deen, datt ech dat Gesetz hei e wéineg och kucken aus der Siicht vum Patient. Net aus der Siicht vun de Professions de santé, vun den Dokteren an esou virun, mä aus der Vue vum Patient. An do ass ee vun de wesentlechen Aspekter deen, datt de Patient erwaart vu sengem Dokter, datt en iwwert déi noutwendeg medezinesch Kenntnisser verfügt, an zweetens, datt e sech um Courant hält iwwert d'Evolutioun vun deenen neisten Erkenntnisser um medezinesche Gebitt.

Dofir ass et esou, datt dat, wat elo am Gesetz steet, schonn e gewëssene Fortschrëtt ass. Dat heescht, datt de Minister kann agräifen, wann elo en Dokter, wéi d'Madame Stein dat esou schéin hei gesot huet, eng Gefor géif gi fir de Patient oder fir sech selwer, datt en da ka suspendéiert ginn. Dat fanne mer ganz gutt.

Positiv och, datt, wann een eng länger Zäit net méi praktizéiert huet, een da muss eng gewëssen Adaptatioun vun der Formatioun maache mat Stagen derbäi, och dat fanne mer ganz sécherlech positiv. Mir mengen awer, datt dat net duergeet. An eisen Aen ass et kloer, datt et esou misst sinn, grad am Beruff vum Dokter, dee mat Kranken ëmgeet, wou et also ëm Gesondheet geet, wou et heiansdo ëm Liewen an ëm Doud ka goen, datt et grad do misst an eisen Aen esou sinn, datt all Dokter sech misst no senger universitärer Ausbildung enger Formation continue obligatoire ënnerwerfen. Dat kann an eisen Aen net aneschtens sinn.

Och an anere Professionne gëtt vu Formation continue geschwat, wou eng Formation continue als obligatoire gëllt. Dat ass dann awer grad wichteg am Beruff vum Dokter, well et jo do wierklech dann ëm Froe vu Verbesserung oder Verschlechterung vun der Gesondheet geet, vu Krankheeten, déi zum Doud kënnen féieren, zu vill Leed an esou virun. Do kann et net sinn, datt do Dokteren do sinn, déi refuséieren, eng seriö Formation continue ze maachen.

D'Situatioun ass jo elo hei zu Lëtzebuerg, datt et positiv Elementer an deem Sënn gëtt iwwer verschidde Sociétés scientifiques médicales engersäits, anerersäits iwwert d'Alformec, déi esou Formatiounscoursen ubitt. Mä dat si keng obligatoresch Coursen. Dat si Coursen, déi ugebuede ginn, déi vun engem gréisseren Deel - wou een ni genau weess, wéi vill Prozent - vun den Doktere suivéiert ginn.

Ech hunn awer mat Doktere geschwat, déi déi Coursë maachen, déi soen, leider wieren et ëmmer

déiselwecht, déi net géifen dohinnerkommen an déi déi Formation continue net géife matmaachen, sou datt déi am Fong stoe bleiwen op engem Niveau vu Formatioun, deen heiansdo zéng, 15 Joer al ass an heiansdo souguer méi.

De Problem ass awer grad an der Medezin, datt mer konfrontéiert si mat enger Disziplin, wou medezinescht Wëssen an deene verschiddene Beräicher vun Diagnostic, vun Therapie an esou viru sech praktesch all siwen, aacht, néng Joer komplett erneiert. Dat heescht, en Dokter, dee virun 20 Joer op der Uni war a keng Formation continue gemaach huet, deen ass ganz einfach haut net méi up to date, fir op eng seriö Aart a Weis e Patient kënnen ze behandelen.

Duerfir also déi Fuerderung, déi mir hunn, fir Formation continue ze maachen. Woubäi mer awer wëlle spëcificiéieren, datt mer ënner Formation continue net dat verstinn, wat een esou heiansdo emol a Presseberichter, a kritesche Presseberichter liest, wou dann Dokteren anscheinend Formations continues gemaach hunn op Kuba oder op de Bermudas oder sou beim Swimmingpool, op d'Käschten net vun der Gesondheetskeess, mä finanzéiert vu pharmazeuteschen Entreprisen, wou et genügend...

(Interruption)

Gelift?

Une voix.- Segelturn!

M. Jean Huss (*déi gréng*).- ...Beispiller gëtt, datt dat awer anscheinend d'Formation continue vun esou munche Medeziner schéngt ze sinn.

Ech wëll dat net verallgemengeren, also wierklech net verallgemengeren. Mä et héiert een awer munch esou Saachen iwver sougenannte Formations continues. Dat, mengen ech, ass net mat Formation continue gemengt; ech wollt et hei just erwähnen.

Mir mengen, datt et eng seriö Formation continue misst gi fir all Dokteren. A fir esou eng Formation continue ze garantéieren, Här Gesondheetsminister, si mer der Meenung...

...si mer der Meenung, Här Gesondheetsminister...

(Interruptions)

Mme le Président.- Här Minister!

M. Jean Huss (*déi gréng*).- ...si mer der Meenung, Här Gesondheetsminister...

Mme le Président.- Ee Moment! Ech géif wann ech gelift den Här Minister bieden, dem Orateur nozelauschteren! Merci, Här Minister.

M. Mars Di Bartolomeo, Ministre de la Santé.- Wann ech vu léiwen Deputéierten ofgelenkt ginn...

M. Jean Huss (déi gréng).- ...bleiwen ech awer der Meenung, Här Gesondheitsminister, datt et d'Aufgab vun engem Gesondheitsminister ass, fir e seriöe Konzept vun enger Formation médicale continue obligatoire fir Prestateurs de soins ze entwéckelen an Diskussiounen doriwwer ze entaméiere mat de Représentants officiels vun deene Professions médicales a Professions de santé concernées, a souguer, datt et och d'Aufgab vum Gesondheitsminister ass, mat deenen zesummen um logistesche Plang an eventuell um finanzielle Plang eng Mise en place vun esou Formations continues obligatoires an d'Wee ze leeden.

Mir gi souguer méi wäit als Gréng. Mir gi souguer méi wäit an enger Motioun, déi ech hei dann déposéieren, gi mer esou wäit fir ze soen, datt misst dru geduecht ginn, Dokteren, déi dat net bereet wäeren ze maachen, datt déi misste kënne sanktionéiert ginn.

Motion 1

La Chambre des Députés,

- considérant que les connaissances scientifiques en matière médicale évoluent de manière de plus en plus rapide;

- considérant que cette évolution ultrarapide se fait à tous les niveaux: mesures préventives, détection précoce, diagnostic, thérapeutique et réhabilitation;

- considérant que les patients malades sont en droit de revendiquer une prise en charge moderne et adaptée au progrès médical de la part des prestations de soins médicaux;

- regrettant cependant que tel n'est pas toujours le cas même si en moyenne les soins médicaux s'effectuent à un niveau plus qu'honorable;

- saluant les efforts de formation médicale continue entrepris par certaines sociétés scientifiques médicales ainsi que par l'Alformec - Association luxembourgeoise pour la formation médicale continue;

- regrettant cependant le fait qu'un certain nombre de prestataires de soins semblent ne pas se montrer concernés par la nécessité d'une formation continue en sciences médicales;

- rendant attentif à la nécessité d'une formation continue véritable, indépendante et critique par rapport aux offres multiformes «d'information médicale» proposées par certaines firmes pharmaceutiques;

invite le Gouvernement

- à élaborer un concept de formation médicale continue obligatoire pour tous les prestataires de soins médicaux;

- à entamer des discussions avec les représentants officiels des professions médicales et des professions de santé en vue des modalités et programmes de ces formations continues;

- à encourager sur le plan logistique et financier la mise en place de telles formations continues obligatoires;

- à sanctionner les prestataires de soins médicaux refusant de se soumettre à de telles formations continues.

(s.) Jean Huss, Claude Adam, François Bausch, Camille Gira, Henri Kox.

Dat ass eng Motioun, déi ech hei déposéieren, Madame Presidentin, a wou ech dann hoffen, datt mer bei Geleeënheet eng Kéier doriwwer kéinten diskutéieren, ob dat elo och an der Kommissioun ass - den Här Wagner huet jo aner Propose gemaach, wat ee misst an der Kommissioun vun der Santé diskutéieren -, mä hei ass op jidde Fall eppes, wat mer elo emol wollten an d'Debatt geheien, well mer dat als wichteg emfannen.

Merci.

Une voix.- Très bien!

Mme le Président.- Merci, Här Huss. Deen nächste Riedner ass den Här Colombera.